

Hemelse skoolgebou vir aardrykskunde en wêreldgeskiedenis

*Die Geestelike Son - Boek 2, hoofstuk 69 (Jakob Lorber)*

69 Kyk, hier voor ons staan alweer 'n ander en verreweg groter gebou; wat word dan hier onderrig? Ons sal gou daaragter kom. Julle weet dat hierdie kindertjies hulle geboorteplek, die aarde, nooit kon leer ken nie, omdat hulle te vroeg, naamlik direk na hulle geboorte, liggaamlik gesterwe het. Maar om die Meester goed te leer ken, is dit ook noodsaaklik om die plek wat Hy as belangrikste plek vir sy erbarming gekies het, van naderby te leer ken. Daarom moet hierdie kindertjies ook juis hierdie plek van naderby leer ken om daardeur te kan begryp hoe en waar die Meester mens geword het, om die hele menslike geslag te verlos en die aarde as leerhuis vir Sy kinders in te rig. So word die geografie van die aarde hier op heel oorspronklike wyse onderrig en verseker op 'n meer doelmatige manier as wat dit by julle die geval is.

2 Ons sal ons dadelik daarvan oortuig hoe hierdie geografie van die aarde hier aangebied word. In die middel van die groot saal waarin ons nou is, is 'n aardbol op 'n groot, pragtige voetstuk, byna gemaak op die manier soos by julle op aarde. Julle moet dit nie sonder meer aanneem nie, maar vas daarvan oortuig wees dat daar op aarde op geen gebied iets bestaan, wat nie reeds lankal vantevore in ooreenstemmende vorm in die gees aanwesig was nie. Daarom is 'n atlas op aarde, ook volstrek geen uitvinding wat nie vantevore in die suiwer gebied van die gees reeds lank, ja ewig lankal beskikbaar was nie.

3 Dit kan julle ook baie goed insien, as julle die vraag aan julleself stel; wat was eerste daar, die aarde of 'n deur mense gemaakte sfeer, wat die teenwoordige vorm van die aarde maar hoogs gebrekkig en skamel weergee?

4 Ek is egter van mening, omdat die aarde in die gees van die Meester sekerlik al baie lank al bestaan het, dat daar ook gegronde redes vir die bestaan van die afbeelding van die aarde sal wees. Daarom kan hierdie sfeer hier immers ook geestelik gesien, baie goed op sy plek wees, en is hy waaragtig van beduidende groter omvang as wat hy ooit by julle op aarde sal kan wees.

5 Gaan maar nader en bekyk hom. Sy oppervlak is nie so geteken soos wat dit gebruiklik is op julle aarde nie, maar dit is as't ware 'n plastiese beeldprojeksie, te vergelyk met julle sogenaamde ligbeelde, wat ook weer die aller nietigste voorwerp op die kleinste skaal te voorskyn bring. Die groot verskil egter tussen die aardse, uiterlike beeldprojeksie en hierdie innerlike, geestelike, is onberekenbaar groot, want hier mag naamlik by die noukeurigste beskouing, ook nie één

atoom ontbreek nie en moet die hele natuur van die aarde volkome noukeurig uitgebeeld wees.

6 Dat dit hier gerealiseer is, kan julle alreeds by die eerste aanblik van baie naby sien; want kyk, die spruitjies, riviere en oseane is hier baie natuurlik; die spruitjies en riviere stroom en die see neem hulle op.

7 Kyk net verder! Die berge, wat die van die aarde baie getrou in die klein voorstel, is duidelik van dieselfde materie. Die gletsers het hulle sneeu en ys, die kalkgebergtes hulle kalk, die laere alpe hulle weivelde en verder na benede hulle bebossing. En kyk net baie goed, elke stad en elke dorp is presies weergegee.

8 Daar lê byvoorbeeld juis julle stad. Bekyk haar maar en dan sal julle sien dat nie die geringste daaraan ontbreek nie. Maar kyk ook net hoe selfs wolke en newels verbytrek, presies in die rigtings en in dieselfde vorme soos wat hulle hulleself altyd gelyktydig op die werklike aarde bevind. Kyk, dit is tog sekerlik 'n perfekte sfeer. Hy is weliswaar taamlike groot; sy deursnee sal volgens julle maatstawwe ongeveer twintig klafter wees. (38 meter in deursnee)

9 Maar hoe kan hy dan aan alle kante oorsien word? Heel maklik, want kyk, in die eerste plek hang, of beter gesê, rus hy op die groot voetstuk deur middel van 'n kolossale spil, volkome parallel aan 'n ronde galery, wat presies tot by die hoogte van die pole reik. Op hierdie galery bevind ons leerlinge hulle, saam met hulle leraars, en bekyk 'n hele meridiaan sorgvuldig. As hulle dit goed in hulle opgeneem het, dan word die sfeer een meridiaan verder gedraai en somaar deur, totdat die hele aarde op hierdie manier bestudeer is.